

Johresbricht vor Meitschiriege

Vor 10 Jahr ha ig zerstemou d Meitschiriege gleitet. Nachhär zerschtemou äs Soiréenummero istudiert, zerschtemou äs Trainingslager für d Meitschi organisiert und zerschtemou ä Gymnastik fürs Turnfest mit ustüftlet.

Vor Corona hani när z'letschtemou ä Turnstund gleitet, z'letschtemou Idee gha, was mit de Meitscho mache u hüt lies ig z'letschtemou dr Jahresbricht vor Meitschiriege vor, gschriebe vor Mara.

Nachemne sehr ruhige 2020 hei mir im 2021 grad dusse gstartet. So ischs Maske träge o grad wäg gfaue. Ufs Turnfest hei mir nid chönne trainiere, derfür füre UBS Kids Cup z Lyss im Juni. Ir letschte Turnstund vor de Summerferie, hei mir mit dr Jugl zäme, ganz vieli verschiedeni Staffette gmacht. Es het wieder gheisse: Meitschi gäg Buebe. Das Jahr hets nid glängt füre Pokal, aber dä hole mir üs de scho wieder zrugg.

Im Septämber sie mir zäme mit dr Jugl doch no anes Turnfest. As Oberländische uf Frutige. Es het aune megs Spass gmacht, ou we mir knapp kei Podestplatz erreicht hei. Im Oktober hei mir Dank euch fliessige Migros-Bon-Sammler, ä coole Usflug id Trampolinhalle Jumping Jack im Jura chönne mache. Ou das Jahr isch die Aktion wieder glofe u mir säge Merci für jede Bon vo euch!

Nach de Herbstferie hei mir aui begeisteret afo Soirée üebe. Aus Supermodels ufem rote Teppich und Zouberinne vo Hogwarts, hei d Meitschi d' Bühni grockt und Publikum begeisteret. Z'Jahr hei mir gmüetlech bim Wald z Stude mitemne Fүүr, brätle und em Samichlous lo usklinge. Es hei aui äs Säckli übercho, obwohl sich die wenigste trout hei äs Värslis säge 😊

Aus Abwächslig, hei mir im Training sit dr Sportwuche jeweils ä Frog gsteut, wo d Meitschi hei müesse rate. Wär am beste isch gsi, het ä Guetschin vom Trampolinpark bercho. Im Momänt si mir fliessig am Volleyball u Ball über die Schnur üebe füre Jugendspieltag am 23. April.

Mir freue üs ufnes wifers tolls Jahr.
Celia, Sandra, Ella und Mara

Und ig wünsche euch 4 Leiterinne witerhin viu viu Freud mit eune Meitschi, Tanja